

静
志
居
诗
话

卷十三

張居正

張居正，字叔大，江陵人。嘉靖丁未進士，改庶吉士，陞編修，歷春坊學士，以禮部侍郎，入內閣，官至太師，吏部尚書，中極殿大學士。卒，諡文忠。有太嶽集。

江陵以奪情，爲清議所不容。然能自任天下之重，定陵冲年，請大閱京營之士，時掌中樞者，山陰吳尚書兌也。尚書繪圖藏之家，予曩從尚書孫錦衣使國輔處見之。及戚武毅鎮薊，大臣行邊，簡閱士馬，隨上功狀，疏恩督秩，烽火不徹於甘泉者，一十五年。江陵之秉國成，可謂安不忘危，得制治保邦之要矣。近靈壽傳尚書維鱗撰明史記，乃與分宜合傳，毋乃過與？于文定與邱尚書云：「江陵以蓋世之功自豪，固不肯甘爲汙鄙，而以傳世之業期其子，又不使濫有交游。其平生顯爲名高而陰爲厚實，以法繩天下而間結以恩。其深交密戚則有賂，路人不敢也。債帥鉅卿則有賂，小吏不敢也。當其柄政，舉朝爭頌其功，而不敢言其過。及其既敗，舉朝爭索其罪，而不敢言其功。皆非其實情矣。」此足以當爰書。聞有題詩于故宅者云：「恩怨盡時方論定，封疆危日見才難。」二語足稱詩史矣。

楊巍

楊巍，字伯謙，海豐人。嘉靖丁未進士，除武進知縣，入爲兵科給事中，歷右都御史，巡撫宣大、陝西、山

西。入爲兵部侍郎，陞南京戶部尚書。召入，改工部，復改戶部，再改吏部，加太子少保，進太保，贈太師。有夢山集。

夢山與中麓、滄溟同郡，而其詩遠法右丞、左司，近取蘇門，不蹈章邱、宛鄙之音，不墮歷下叫囂之習，信豪傑之士也。集不甚傳，近新城王尚書、德州謝郎中重爲鏤板，始行於世。夢山自言「不知詩，補晉臬時，學使者曹君紀山謂當以唐人爲宗，且辨其體格，及歸田，四明呂山人往來海上，相與倡和，共明此道」云云。呂山人者，時臣中甫也。紀山名汴，江陵人，嘉靖辛丑庶吉士，仕至右副都御史，巡撫雲南。以夢山推許若是，度其詩必有可觀，惜無好事如王謝兩公刻之以傳也。當嘉靖初，北地信陽朝華已謝，滄溟集盛唐人字句以爲律，一時宗之。正猶隋苑，翦綵成花，淺碧深紅，未嘗不眩人目。然生意絕少。此時讀夢山詩，如水仙十囊，江梅一萼，嫣然薄冰殘雪之外，有不愛惜者邪？

〔附錄〕沈山子云：「夢山五律，固是長城，其全首矜鍊者不待言。句如『風雨樓煩國，關山李牧祠』，『春風吹戶牖，芳草遍庭除』，『薄地不盈頃，草房才數間』，『漁樵原舊業，荷芰有初衣』，『花憶春城發，門憐芳草多』，『北窗風到處，深樹鳥鳴時』，『磬雪春仍積，岩花夏始開』，『家貧人臥穩，橋斷客來稀』，『杯外分平楚，窗中到遠山』，『霜筇連夕院，野燒到經臺』，『野燒驚沙雁，霜風落塞榆』，『人垂燈下淚，鬼哭雨中魂』，皆近自然，豈四溟山人所能及？」

王樵，字明逸，金壇人。嘉靖丁未進士，累官南京右都御史。卒，贈太子少保，諡恭簡。有方麓集。

方麓研心著書，自言六經畢其四，詩特游藝，然清婉軼倫，當鮑甄、太函、白榆、澹思、叫囂之會，乃聞此雅韻，實獲我心也。短歌答趙江都金山見懷云：「海門今長風，中流兮孤嶼。懷美人兮何方？覽大江兮東去。」望湖亭云：「平囂門外春雨，遠寺山西夕陽。柳暗溪橋輦路，水肥種桂江鄉。」孤村數家隱樹，一曲清流抱山。四月城中未有，林端黃鳥關關。」

孫永思

孫永思，字性孝，蒲州人。嘉靖丁未進士，除行人，選授浙江道御史。

侍御海珠寺，李崔二鴻臚詩云：「象設鄰蛟室，江流達海門。上方無陸路，四壁有潮痕。香霧籠珠樹，飛花墮玉尊。漁歌相聽處，萍水不須論。」登鎮海樓云：「越王臺接五層樓，島嶼連空起暮愁。瘴海波濤浮日月，炎天風雨自春秋。亂帆歸晚聲相軋，萬樹邊江葉盡流。莫倚危闌聽吹笛，武陵離思在南州。」二詩巡按廣東時作，蓋嘉靖丙辰年事。

楊繼盛

楊繼盛，字仲芳，容城人。嘉靖丁未進士，除南京吏部主事，入爲兵部員外郎，坐論馬市，貶狄道典史。稍遷知諸城縣，陞南京戶部主事，轉戶部員外，調兵部，疏劾嚴嵩論死。贈太常少卿，諡忠愍。有集。

〔附錄〕皇甫子循云：「楊忠愍辭尚宏麗，語罕怨誹，江河一瀉，乃徵其才。光焰萬丈，悉由於氣。」

彭 輅

彭輅，字子殷，嘉興人。嘉靖丁未進士，除江西布政司照磨，遷知新淦縣，左遷應天儒學教授，轉國子監博士，升南京刑部主事。有比部集。

先生早慧，於詩文不甚敦琢。其持論取法中唐，謂：「神在象外，象在言外，言在意外。」然率矢口肆筆而成，頗類解大紳、卜華伯一流，昔人所以有才多之憾也。

徐 學 謨

徐學謨，初名學詩，字子言，更字叔明，蘇州嘉定人。嘉靖庚戌進士，授禮部主事，歷郎中，出知荊州府，遷副使，擢僉都御史，撫郎陽，召拜禮部尚書，加太子少保。有海嶠、春明二集。

宗伯本名學詩，以與劾分宜者同姓名，遂更爲謨。昔杜欽損目，人斥爲盲，鄴惡其同字，遽自稱疾，猶見詆於當時。若宗伯更名，乃屬患失。百世而下，知有直臣陳孟公之名遵，何必驚坐諱哉！宗伯雅負詩名，然多儒響，殆肖其人。

劉 效 祖

劉效祖，字仲修，濱州人。嘉靖庚戌進士，除衛輝推官，徵授戶部主事，歷員外郎，郎中，出爲陝西按察副使。

有雲林集。

副使負經世畧，坐計吏罷官，晚寄情詞曲，所填小令，可入元人之室。如沉醉東風云：「東華路，塵沙滾滾，玉河橋，車馬紛紛。官高休羨榮，命蹇須安分。靠青山，緊閉柴門，閒把英雄細討論，能幾個，到頭安穩？」又一闕云：「門巷外，旋栽楊柳，池塘中，新浴沙鷗。半灣水繞村，幾朵雲生岫。愛村居，景致風流，閒啜廬全茗一甌，醉翁意，何須在酒。」朝天子云：「喜碧山日親，把銀魚早焚。銷繳了，功名分。輶車鳩杖鹿皮巾，也不讓，黃金印。晚景無多，前程休問。趁明時，自在隱。尋幾個故人，團坐在華門。嘗則把，陰晴論。」雜之小山樂府中，不能辨也。昭陵嘗遣中使，索其題冊，呼曰「念菴」。念菴，副使別字也。因賦詩云：「更生雙鬢已蕭騷，敢謂文章擅彩毫。過誤偶承明主問，因緣不是鬱輪袍。」都人傳其事，以爲列朝所未有。詩亦爽豁，惜集不傳。

方宏靜

方宏靜，字定之，歙縣人。嘉靖庚戌進士，累官南京戶部右侍郎。

〔附錄〕王仲房云：「定之祖法盛唐，而於王、孟尤近。若『流水不知處，幽禽相與飛』，『不知春色減，忽見林花飛』，『永日空山寂，幽然時一吟』，宛然二君遺響也。」

樂尚約

樂尚約，字孔源，膠州人。嘉靖庚戌進士，由溧水知縣，遷授江西道御史，謫安州判官，遷懷慶推官，被論削籍。

孔源官詞云：「玉簫吹斷落花香，空結流蘇五鳳凰。不遣和戎卽恩幸，敢矜顏色過昭陽。」殊不失溫柔敦厚之教。

潘季馴

潘季馴，字時良，號印川，烏程人。嘉靖庚戌進士，除九江推官，擢江西道御史，升大理寺丞，歷少卿，以僉都御史，治河，累官南京兵部尚書，罷歸，起刑部尚書，加太子少保，總理河道。有留餘堂集。

印川自嘉靖乙丑，受命治河，至萬曆庚辰工成。著有宸斷大工錄。先後四總河務，晚輯河防一覽，其大指謂：「通漕於河，則治河卽以治漕，會河於淮，則治淮卽以治河。合河、淮而同入於海，則治河淮卽以治海。」立意在築隄束水，借水刷沙，以此奏功。百年以來，俱守其指畫，可謂能捍大患者。獨怪天啓初，補謚列朝名臣，而公獨不與焉。錄其詩，爲之歎息。

龐尚鵬

龐尚鵬，字少南，南海人。嘉靖癸丑進士，除平樂知縣，入爲監察御史，歷官右副都御史，巡撫福建。天啓初，追諡忠敏。有百可亭摘集。

少南視饒兩浙，總理兩淮，長蘆鹽屯，身處脂膏，不能自潤。集中虛室行云：「細視餅中久無粟，舉火終朝待鄰曲。長飢近午始一餐，敢望豐年收萬斛。」自注：「三月中旬，已貸粟矣。」卽此亦是難得。

李 袞

李袞，字于田，內鄉人。嘉靖癸丑進士，選庶吉士，除檢討，遷南京禮部郎中，歷官提學副使。有太史集。

于田博洽，中州人，以擬楊用修，而歸田之後，縱情聲伎，放誕不羈。女優登場，至雜伶人中，持板按拍，主人知而延之上坐，恬然不爲怪。及去，借主人櫪上馬，挾女優連騎而去。此其狂態，更甚於用修矣。詩亦少深思，絕句頗強人意。嘉靖宮詞云：「沉水龍涎徹夜焚，桂宮芝館結祥雲。壇前纔布諸天位，苑外先催學士文。」玉貌終年侍禁闈，每逢時節賜金緋。君王不愛纖腰舞，裁作雷壇拜斗衣。「小車飛曳向元都，翠羽金翹笑自扶。玉螭樹邊長日市，內璫爭買大秦珠。」泥金檢玉祝長生，萬國封章止進呈。月滿西宮更漏永，九重風落步虛聲。」

徐 師 曾

徐師曾，字伯魯，吳江人。嘉靖癸丑進士，選庶吉士，授兵科給事中，歷刑科左給事。有湖上集。

伯魯說經鑿鑿，又輯文體明辨，以迪後學。一官清要，五疏乞歸。其述志賦云：「相先民之不朽兮，托三而流傳。吾何有一於茲兮，死速朽而猶魯。惜青春之不我與兮，忽已至乎衰年。胡不及時以精進兮，擇可修而勉旃。」昔賢有言：「耄未至愒，衰不及頓，尚可厲志於所期。」又言：「進不及達，退無所矯。」伯魯之謂矣。詩亦清婉，蓋斤斤學唐者。

季 科

季科，字與登，江陰人。嘉靖癸丑進士，除行人，選授禮科給事中，出爲江西布政司參政。有雪浪、閒居二集，丁燕鷗盟錄。

與登歸田之後，田產所入，悉以築園。園在萬壽山麓中，有六曲徑，蒼雪嶺，賜閒堂，雪浪湖。湖中有青螺墩，妙高閣。湖上有寄寄堂，紅雲閣，華陽洞天。又鑿洞爲小桃源，中有赤城樓，來鶴亭，桃花泉，曲水亭，雲林，桐江，片石。恒與朋舊觴咏其間，足稱好事。詩亦安整不佻。

盛 周

盛周，字文郁，秀水人。嘉靖癸丑進士，除知浦城縣，入爲刑部主事，歷郎中，出知東昌府。

太守少從王龍溪游，與沈先生靖夫講學于聞湖書院，遺址在梅家蕩水中央，其子姓至今聚族于斯。聞其報最日，忤分宜父子，不得臺諫，蓋莊士也。

姚汝循

姚汝循，字敘卿，上元人。嘉靖丙辰進士，除杞縣知縣，遷南京刑部郎中，出知大名府，謫嘉州知州。有錦

石齋集。

敘卿詩格不高。然五古遠倣陶、韋，近體能宗大歷，此益藩漢南道人人之李、何諸公之列，目爲「盛明十二家」也。回雁峰云：「回雁峰頭望帝京，寒雲黯黯不勝情。賈生已道長沙遠，今過長沙又幾程。」

卞錫

卞錫，字叔孝，嘉善人。嘉靖丙辰進士，除中書舍人，遷吏部稽勳主事。有豹山集。

〔附錄〕陳仲醇云：「分宜柄國，言者以蚍蜉撼樹，不勝者止。司勳往往抗其盛氣。方袖封章彈之，適聞親計，還里。故其居恒所爲詩，聊蕭不平，感慨畢露。」

錢鎮

錢鎮，字守中，烏程人。嘉靖己未進士，官兵部郎中。有淡菴集。

守中從唐子鎮講學，居弟子之首，而詩無塵腐之習。中年卜宅思溪，掘地，得宋王觀察永從墓，亟掩之，而築堂其上，不以爲忌也。永從嘗刊五代史纂誤、雜錄二書，置本郡庠後，取以補監本，見陳氏書錄解題。今

思溪土人，不復有知其姓名者矣。錄守中詩，附識於此。

張祥鳶

張祥鳶，字道卿，金壇人。嘉靖己未進士，除戶部主事，歷員外，郎中，出爲河東運司同知，遷知雲南府。有華湯洞稟、虛菴集。

道卿詩，瀟灑絕俗，頗類「永嘉四靈」。上巳日寄鄭虛舟云：「三月三日春可憐，百勞聲裏花如煙。臨邛大夫有佳客，廣文先生無酒錢。放歌誰知舞雩曲，洗研獨寫蘭亭篇。我欲從之問奇字，出門無那春風顛。」

〔附錄〕愚山云：「道卿與七子同時，亦相還往，其詩以清潤爲主，不染叫囂之習，故不爲時人所稱。如云：『雁嘶江塞月，人枕戍樓霜。』信警句也。」

申時行

申時行，字汝默，吳縣人。嘉靖壬戌賜進士第一，累官少師，兼太子太師，吏部尚書，中極殿大學士。卒，贈太師，諡文定。有賜閒堂集。

趙尚書珩識于廷益於早歲，顧尚書璘識張叔大於童時，傳者以爲佳話。先太傅公九齡，獲見文定，文定特起避席。時先公未就塾，文定留之邸第讀書。一日，從師出遊，先公失足蹈汙泥，文定命僮子回取履，僮子誤持文定朝幘至，先公不敢納，文定笑曰：「履之，終當踐我迹耳。」及舉順天鄉試，同學少年有恃才者，

曰：「朱兆隆亦能成名邪？」文定佛然曰：「兆隆將大魁天下，若輩焉知。」明年先公果臚傳第一，其藻鑒不爽若是。文定不以詩見長，然鉅篇長律，鋪揚典麗，足令操觚者縮手。如云：「老去空悲千里驥，秋來真憶四腮魚。」風度可想也。

余有丁

余有丁，字丙仲，鄞縣人。嘉靖壬戌賜進士第三，除編修，累官戶部尚書，兼武英殿大學士，終少傅，兼太

子太傅，建極殿大學士。卒，贈太保，諡文敏。有文敏公集。

文敏送張嵎嶸肖甫一律云：「客行新霽後，曙色啓城頭。曉徑穿雲溼，春塘帶雨流。江蘼牽客思，山鳥動春愁。何事新芳歇，王孫不可留。」絕類劉文房。

戚元佐

戚元佐，字希仲，秀水人。嘉靖壬戌進士，除禮部主事，歷員外，郎中，升尚寶司少卿。有青藜閣集。

吾鄉彭子殷論詩，卽尚七子，然其詩不類也。至戚希仲則全以七子爲圭臬。弇州列四十子，不及希仲何與？早朝云：「鳳掖傳呼早，晨趨逼禁闌。天香浮輦靜，宮漏隔花微。仙掌明河動，周廬列宿稀。不知風露重，先溼侍臣衣。」

鄭履淳

鄭履淳，字伯寅，海鹽人。嘉靖壬戌進士，除刑部主事，改尚寶司丞。建言，廷杖。終光祿寺少卿。有集。

昭陵繼世，海宇晏清，少卿時爲尚寶丞，初無言責，乃上痛哭之書，至云：「物怪人妖，天鳴地震，彗星兩見於尾女，日月蝕蝕於元春，鬼神告凶，笛害落至。殆有陳涉、阿骨打之徒，窺伺於世，雖李綱、宗澤之才，展布猶難。」其亦過於激烈矣。當日予杖一百，流血濡縷。至今遺袴，藏其故宅。

沈玄華

沈玄華，字遂伯，一字少河，嘉興人。嘉靖壬戌進士，除禮部主事，歷官南京太常寺卿，轉大理寺卿。

明南都太廟，嘉靖中，爲雷火所焚，尚書湛若水請重建，而夏言阿世宗意，請罷。有旨，并入奉先殿。按長陵每自稱曰：「朕高皇后第四子也。」然奉先廟制，高后南向，諸妃盡東列，西序惟碩妃一人。具載南京太常寺志。蓋高后從未懷妊，豈惟長陵，卽懿文太子，亦非后生也。世疑此事不實。誦沈大理南都奉先殿紀事詩云：「高皇肇太廟，松桷連穹窿。尊祖有孝孫，典禮通升躋。一從遷都後，遺制終未睽。有司列俎豆，上公視瓚圭。豈意歲甲午，烈火墮榱題。嘉謨出出音，其兆先端倪。盈庭議移祀，中廢成町畦。猶餘奉先殿，薦新及頌饗。微臣承祀事，入廟歌鳧鷖。高后配在天，御幄袖所棲。衆妃位東序，一妃獨在西。成祖重所生，嬪德莫敢齊。一見異千聞，實錄安可稽。作詩述典故，不以後人迷。」斯明徵矣。大理性恬

退，不樂膺仕，歸遂潔白之養。歿後，元孫傳弓撫拾遺集，早夭，失傳。是詩，獲於高工部寓公家。

王叔杲

王叔杲，字陽德，永嘉人。嘉靖壬戌進士，官至湖廣參政。有玉介園集。

王氏爲永嘉族望，其先世毓生七子，七子生二十八子，二十八子生九十四子，九十四子生二百六子，二百六子生三百五十子，參政其一也。三百五十子生四百九十子。其枝葉亦繁昌矣。

穆文熙

穆文熙，字敬甫，東明人。嘉靖壬戌進士，除行人，進司副，遷工部員外，改尚寶司丞，轉吏部員外，出爲廣

東按察副使。有逍遙園集。

敬甫論詩，沾沾自喜，亦強作解事爾。集爲劉子威，石拱辰所定，又安得佳？

錢貢

錢貢，字時庸，桐鄉人。嘉靖壬戌進士，除知新建縣，入歷刑部郎中。有愛存齋。

錢公居斷山之陰，沒葬山麓，其後人至今聚族柞溪左右，桑麻松竹，蔥蒨依然。長篇不事雕繪，有白太傅遺音。京邸懷歸別妻弟唐楮汀云：「此日意不樂，掩關有所思。忽聞君遠來，錯愕令我疑。平生不辭鄉，安

得來京師？去年與君別，屈指已一朞。南望懷故人，日與浮雲馳。嗟予坐羈束，素顏日以緇。金門盛才賢，迂疎將何爲？感之百憂集，歎息還自嗤。君今馬首南，握手復何辭。投簪雖未能，煩君語吾兒。貧賤雖爾慙，富貴匪我期。願言各努力，勉將門戶支。予家柞溪東，綠水環茅茨。豈獨饒桑麻，松竹植亦宜。好闢十畝園，樹藝須及時。護筍編枳棘，灌花引泉池。待予此中老，與君同栖遲。此願良未果，永懷常在茲。去去勿復陳，人生多別離。夜闌欹枕卧，暑雨捎霖思。」

何洛文

何洛文，字啓圖，信陽州人。嘉靖乙丑進士，選庶吉士，歷官禮部左侍郎，兼翰林院學士。有震川集。

震川，大復之孫，仕雖通顯，詩頗庸熟，去祖武尚遠。題章皇帝御筆白馬云：「臺上黃金駿，毫端白雪驄。玉花生御榻，寶繪奪天工。照夜雙珂瑩，凝霜匹練空。瑤池仙馭遠，猶見畫圖雄。」

胡泮

胡泮，字原荆，無錫人。嘉靖乙丑進士，除永豐知縣，再知安福，入爲廣西道御史，以建言，落職爲民。有

采真堂集。

侍御以建言削籍，任俠結客，所識窮乏，多受其恩。歿後，王承父爲具狀，屠緯真爲銘墓，王元美爲作傳，咸盛稱之。詩亦間有合作，過雅宜別業云：「不見王摩詰，猶餘華子岡。隔河山杳靄，斷樹水微茫。有子

開松徑，留歡正夕陽。漁舟投暝合，杯外卽滄浪。」

潘志伊

潘志伊，字嘉徵，吳江人。嘉靖乙丑進士，除定州知州，升南京兵部員外，歷郎中，出知九江府，謫知陳州，移紹興府同知，轉南康知府，以江西按察副使，備兵袁州，以太行僕寺卿，轄甘肅，遷廣西參政。

潘公從游吾鄉沈石雲先生之門，講學之餘，詩不多作。所題存石草堂一篇，卽石雲之書屋也。其辭云：「名園迴塵域，參差開石林。丹梯襲曉光，碧嶂含夕陰。昔自鬱林來，置此閑幽襟。緬彼巨靈跡，宛在梧江潯。夫子肯堂構，誅茅面雲岑。棲巖意已遠，陟謁思逾深。樞衣緣磴道，拭目見嶽岑。茲言懷仰止，誰謂慙登臨。」

王圻

王圻，字元翰，上海人。嘉靖乙丑進士，除清江知縣，調萬安，擢雲南道御史，出爲福建按察僉事，謫邛州判官，兩知進賢、曹縣，遷開州知州，歷官湖廣提學僉事，陞陝西布政司參議。有洪州類藁。

洪州拜分陝之命，卽請告終養。既歸淞江之濱，種梅萬樹，目曰「梅花源」。仰屋梁著書，門閥皆安席硯。所撰續文獻通考、謚法通考、兩浙鹽志、海防志、三吳水利考、碑史彙編，雖舛漏尚多，體例未當，要亦留心有用之學者。觀忠惠祠有感云：「傑哉龍陽尉，忠義今所希。民瘼一憤激，抗疏干天威。手持登聞鼓，口叫

閨闈扉。但念流亡苦，豈惜軀命微。雖經悟明主，捐生視如歸。歲額減過半，始願終不違。皇恩與士節，千古同光輝。春秋薦蘋藻，英爽此永依。遺跡炳簡策，身沉名自飛。願爾賢達裔，奕世延清暉。」

〔附錄〕郭美命云：「遠之北地，信陽，近之海門，所稱七子，此亦一是非，彼亦一是非。諸君子爲的，而後進之士射聲焉，未有能中者也。先生詩，黜其佻巧，而本之自然。謝其誇毗，而歸之實際。去其叫噪，而由乎冲虛。蓋矯志而獨行者也。」

歸有光

歸有光，字熙甫，崑山人。嘉靖乙丑進士，除長興知縣，量移順德通判，遷南京太僕寺丞。有震川先生集。

弇州早年評震川文，謂：「如秋潦在地，有時汪洋。不則，一瀉而已。」晚歲，乃作贊云：「千載有公，繼韓歐陽。予豈異趣，久而自傷。」蓋悔之深矣。詩非兼擅，然猶勝七子成派。遊靈谷寺云：「晨出東郭門，初日照我顏。春風吹習習，好鳥鳴啾啾。巖阿見黃屋，登坡尋神山。半日猶山麓，十里長松間。蜿蜒芳草路，寂寞古禪關。畫廊落丹牕，朱戶蝕銅環。殿起無梁迴，塢留玩珠攀。蒼鼠戲樹捷，野鹿看人閒。山深靜者愛，日晏未知還。」

皇甫冲

皇甫冲，字子浚，長州人。嘉靖戊子舉人，與弟泮、沆、濂並有盛名，稱四皇甫。有華陽集。